

INUIT ATAQATIGIIT

INATSISARTUNI



UKA 2013/22
9. oktober 2013
Ane Hansen

Nunat Avannarliit Killiit Siunnersuisoqatigiiffiata kaammattuutitut aalajangersaganik nr. 2/2012-imik, ataani allassimatut oqaasertalimmik, Inatsisartut ta-persiinissaannik Inatsisartut aalajangiiffigisassaattut siunnersuut:

Nunat Avannarliit Killiit Siunnersuisoqatigiiffiata Savalimmiuni Naalakkersuisunut, Kalaallit Nunaanni Naalakkersuisunut Islandimilu Naalakkersuisunut kaammattuutigaat apeqqutit issittumut tunngasut eqqarsaatigalugit nunat suleqatigiinnerannik sakkortusaanermik aallartitseqqullugit, kiisalu suliasaqarfinni nunat ataatsimut soqutigisaaqarfigisaanni taamatullu iloriusissioornissamut isumaqatigiissuteqarfigisinnaasaanni Issittoq eqqarsaatigalugit nunat avannarliit killiit ataatsimut iloriusissioornissaannik sulissuteqaqqullugit. Siunnersuisoqatigiiffiup taamatuttaaq naalakkersuisut qinnuigaat nunani pineqartuni nunanut allanut naalakkersuisut akuttunngitsumik ukiumoortumik minnerpaamillu ukiut marlungorneri tamaasa naapeqatigiittarnissaannik apeqqutit issittumut tunngasut kiisalu apeqqutit allat nunat avannarliit killiit ataatsimut soqutigisaaqarfigisaat oqallisigalugit. Ataatsimiinnerit taakku Nunat Avannarliit Killiit Siunnersuisoqatigiiffiata ukiumoortumik ataatsimiinnerinut atatillugu sapinngisamik ingerlanniarneqartassapput.

(Aallartitat siulittaasuut)

Silaannap pissusaata allangoriartornera ilutigalugu issittumi nunat soqutigineqaleriartornerat annertusiartorpoq, tamatumalu nassatanik aamma nunat avannarliit inukittunnguanik inullit Naalagaaffinnik nukittunerusunik tatineqariartorput. Apeqqutit issittumut tunngassuteqartut isummorsorfigineqarnerani pissusissamisoorpoq issittumi nunaqartut apeqqutit issittumi inuunermi tunngassuteqartuni isummersoqataallutik aaliangiiniarnermi peqataallutillu tusaaneqarnissaat nukittorsassallugu.

Inuit Ataqatigiit isumaqatigaarput 2012-mi Ilulissani Nunat Avannarliit Killiit Siunnersuisoqatigiiffiata aalajangersimasumik qulequtaqartitsilluni ataatsimeersuartitsinerani siunniunneqartup nunatsinniit peqataaffigineqarnissaa.

Nunat pineqartut tassa Savalimmiut, Island, Kalaallit Nunaalu inuutissarsiornermi soqutigisanik arlalissuartigut ataatsimoorussaqaarput qularutigingilarpullu soqutigisap ataatsimoorunneratigut tusaaniarneqarnissarput nukittorsarneqarsinnaasoq.

Assersuutissaqqissut ilagaat ukiuni kingullerni aalisarnermi pisut, makrillinik aalisarnermi saqittaannermi nunat avannarliit Killiit Naalagaaffinnik nukittunerusunik tatineqarnerat ataatsimoorullugu iliuuseqarfigineqarsinnaasoq. Tassa inuutissarsioornitsinni ataatsimoorussaqaarpugut, ataatsimut isumaqarnermik nittarsaassinikkut nukittunerusunik inissiffiginiarsinnaasatsinnik, silaannap allangoriartornerata nassataanik aalisakkat ingerlaarfiisa angornerisa nassataanik nunat assigiinngitsut pisisartagaasa naleqqussartariaqarnerat suliasaavoq imaannaanngitsoq ataatsimoorfigalugu erseqqissaaffigisariaqartoq.

Silaannap allangornerata kingunerisaanik imaani uumassusillit ingerlaarfiisa allangorneri naleqqussarfigisariallit suleqatigiissutigisinnaavagut. Immap pisuussutaanik nerisa-

qarnigut nunarsuarmioqatigiinni akueriومانeqanngitsut soorlu puisit arferit il.il. pillugit suleqatigiinnissarput pisariaqaaq suleqatigiissutissaaleqinngeqaagullumi.

Taamaamat Inuit Ataqatigiit pissusissamisoortutut isigaarput Nunat Avannarliit Killiit Siunnersuisooqatigiivisa ataatsimiineranut atatillugu minnerpaamik ukioq allortarlugu nunat pineqartut Nunanut allanut Naalakkersuisuisa naapittarnissaat.

Taamatut oqaaseqarluta siunnersuut taperserparput.